

rent, de obsidenda & evertenda urbe Ierusalem. Ex Vit. Christi. Sect. 134.

*Petrus & Ioannem mittit Iesus in Ierusalem, ut parent Pascha.*

XVIII. Prima die Azymorum, cum Discipuli petiissent à Christo ubi vellet manducare Pascha, misit duos ex Discipulis suis Petrum & Ioannem, & dicit eis: Ecce introeuntibus vobis in civitatem, occurret homo amphoram aquæ portans, sequimini eum, in domum in quam intrat; & dicetis patrifamilias domus: Dicit tibi magister: apud te facio Pascha cum Discipulis meis, &c. Matth. 26. vers. 17. 18.

*Christus Petri & aliorum Apostolorum pedes lavat.*

XIX. Surgit (Christus) à Coena (Paschali) & ponit vestimenta sua, & cum accepisset linteam præcinxit se. Deinde mittit aquam in pelvim, & coepit lavare pedes Discipulorum, & extergere linteo, quo erat præcinctus. Venit ergo ad Simonem Petrum, & dicit ei Petrus: Domine tu mihi lavas pedes? respondit Iesus, & dicit ei: Quod ego facio tu nescis modò, scies autem postea. Dicit ei Petrus: Non lavabis mihi pedes in æternum. Respondit Iesus: Si non lavavero te, non habebis partem mecum. Dixit ei Simon Petrus: Domine non tantum pedes meos, sed & manus & caput. Ioann. 13. vers. 4... 9.

*Petrus, Christo de proditore suo loquente, precatur Ioannem, ut sciat, quis esset.*

XX. Post alteram Coenam, in qua Christus Eucharistiæ Sacramentum instituit, dicit Iesus: Amen, Amen, dico vobis, quia unus ex vobis tradet me. Aspiciebant ergo ad invicem Discipuli hæsitantes de quo diceret, & contristati valde coeperunt quærere, quis ex eis hoc facturum esset. Erat recumbens unus ex Discipulis in sinu Iesu, quem diligebat. Inruit huic Simon Petrus, & dixit ei: Quis est de quo dicit? Itaque cum recubisset ille supra pectus in Iesu, dicit ei: Domine quis est? respondit Iesus: Ille est cui intinctum panem porrexero. Et cum intinxisset panem, dedit Iudæ Simonis Iscariotæ. Matth. 26. vers. 21. 22. 23. Marc. 14. vers. 18. 19. 20. Ioann. 13. vers. 21... 26.

*Pro Petro orat Christus, ut à fide non deficiat.*

XXI. Ait Dominus: Simon, Simon, ecce Satanas expetivit vos, ut cribraret sicut triticum: ego autem rogavi pro te, ut non deficiat fides tua: & tu aliquando conversus, confirma fratres tuos. Luc. 22. vers. 31. 32.

*Petri præsumptio, qui, se posse ubique Christum sequi, credit.*

XXII. Christus dicit adhuc se modicum cum Discipulis fore. & vadere, quo ipsi non possent venire modo. Dicit ei Simon Petrus: Domine quo vadis? Respondit Iesus: Quo ego vado, non potes me modo sequi: sequeris postea: Dicit ei Petrus, quare non possum

te sequi modo? Dicit Discipulis Iesus: omnes vos scandalum patiemini in ista nocte: Respondens Petrus, ait: etsi omnes scandalizati fuerint in te, ego numquam scandalizabor. Matth. 26. vers. 31. 32. 33. Ioann. 13. vers. 33... 36.

*Petrus ter se negaturum antequam Gallus bis cantet, prædicet Christus.*

Respondit Iesus: Animam tuam pro me pones? Amen, Amen dico tibi: quia in hac nocte antequam Gallus bis cantet, ter me negabis. At ille amplius loquebatur: Et si oportuit me mori tecum, non te negabo. Similiter & omnes Discipuli dicebant. Ioan. 13. vers. 38. Matth. 26. vers. 34. 35. Marc. 14. vers. 30. 31. Luc. 22. vers. 33. 34.

*Petrus Christum sequitur ad hortum Gethsemani.*

Venit Iesus cum Discipulis in villam Gethsemani, ubi erat hortus: & assumit Petrum, & Iacobum, & Ioannem, & dicit eis: Tristis est anima mea usque ad mortem: Sustinete hic, & vigilate mecum: & avulsus ab eis pusillum, orabat, & cum surrexisset, & venisset ad Discipulos, invenit eos dormientes, & ait Petro: Simon dormis? Vigilate, & orate ne intretis in tentationem: & iterum abiens oravit, & reversus denuò invenit eos dormientes: & relictis illis iterum abiit, & oravit tertio, & venit tertio ad Discipulos suos, & ait: Dormite jam, & requiescite, ecce appropinquavit hora & Filius hominis tradetur in manus peccatorum. Surgite, eamus: ecce qui me tradet, prope est. Matth. 26. vers. 36... 46. Marc. 14. vers. 32... 42. Luc. 22. vers. 39... 46.

*Petrus auriculam amputat Malcho Summi Sacerdotis servo.*

Christus Iudæ osculo traditus, & à cohorte militum, & Pontificum, & Pharisaorum Ministris captus. Simon Petrus unus ex his, qui erant cum Iesu, extendens manum, exemit gladium suum, & percutiens servum Principis Sacerdotum amputavit auriculam ejus dexteram. Erat autem nomen servo Malchus. Dixit Iesus Petro: Mitte gladium tuum in vaginam: omnes enim qui acceperunt gladium, gladio peribunt. Tunc Discipuli omnes relicto eo (Iesu) fugerunt. Matth. 26. vers. 51... 56. Marc. 14. vers. 50.

*Petrus Christum à longè sequitur, & tandem intrat in atrium Pontificis, ut videret finem.*

Sequebatur autem Iesum à longè Simon Petrus, & alius Discipulus, qui notus Pontifici, introivit cum Iesu in atrium Pontificis. Petrus autem stabat ad ostium foris. Exivit ergo Discipulus alius, qui erat notus Pontifici, & dixit ostiariæ, & introduxit Petrum, usque in atrium Principis Sacerdotum, accensoque igne in medio atrii, & circumfidentibus ministris, erat Petrus in medio eorum sedens, & calefaciens se, ut videret finem: